

INUIT ATAQATIGIIT

INATSISARTUNI



Qasigianniguit, 20. August 2015
UKA2015/92

Inatsisartut suleriaasianni § 36 najoqqutaralugu Inatsisartuni oqallinnissamik siunnersuummik maanna saqqummiussivunga:

Akiitsunut Aningaasaliisarnermullu periusissiaq atuuttoq pillugu oqallinnissamik siunnersuut. Qanoq ilionnikkut qulakkiissavarput Kalaallit Nunaata ataatsimut akiitsui aningaasaliinerilu aningaasaqarnikkut patajaatsumik qajannaatsumillu inissisimanissaani toqqammavileeqataanissai? Akiitsunut Aningaasaliisarnermullu periusissiaq maanna piusup atuuttullu Namminersorlutik Oqartussanut, kommuuninut Namminersorlutillu Oqartussani ingerlatseqatigiiffiit pigineqartuni pitsaaqutai pitsaanngequtaalu suuppat, qanorlu ilionnikkut periutsip malinneqarnissaa qulakkiissavarput?

(Inatsisartunut ilaasorta, Sara Olsvig, Inuit Ataqatigiit)

Ukioq 2012-imi Naalakkersuisut akiitsunut aningaasaliisarnermullu periusissiaq saqqummiuppaat, tamatuma kingorna Namminersorlutik Oqartussani, kommuunini aammalu Namminersorlutik Oqartussat ingerlatseqatigiiffiit pigisaasa ataatsimut akiitsui pillugit aalajangiinerni toqqammaviusarsimalluni.

Inuit Ataqatigiit isumaqarput akiitsunut aningaasaliisarnermullu periusissiami mianersornissamik tunngaviusut malinneqarnissaat pingaaruteqartoq. Tamatumani Kalaallit Nunaani sapinngisamik aningaasaqarnikkut patajaatsumik qajannaatsumillu inissisimanissaa qulakkeerneqarnissaa anguniarlugu.

Kalaallit Nunaat aningaasaqarnikkut ukiuni makkunani tamaviaarnartumik inissisimavoq, suliffissarsiortut amerlassusaat qaffaseqaaq, suliniutissanillu sanaartugassanik pisariaqartitsinerit nassuerutigivagut ataavartumik siunissamilu ungasinnerusumi ingerlanneqarsinnaasunik aningaasaliisinaanissat pisariaqartippagut.

Aningaasaqarnermut Naalakkersuisup Aningaasaqarnikkut ingerlatsineq pillugu Nalunaarut 2015-imeersumi akiitsunut aningaasaliisarnermullu periuseq piusooq ersarissaassutigaa, allallunilu taaneqartut "pisortat aningaasaliineranik taarsigassarsinerannillu isumaqatiginninnermi suli atuulluni" allalluni. Aningaasaqarnikkut ingerlatsineq pillugu Nalunaarusiami pineqartumittaaq Aningaasaqarnermut pisortaqaarfiup annertusisamik aqqissuusseqqinnissat piareersaatigaat Naalakkersuisooq allassimavoq, tamatumani missingersuusiornermut inatsit nutaaq missingersuusiornernilu ataqatigiissaarinerit aningaasaqarnikkullu aqutsinerit pitsaanerusunik periusissanik kinguneqarfiunissaat Naalakkersuisup allassimalluguttaaq. Aqqissuusseqqinnissap ilaatigut imarivai nutarterinerup ilaatigut kingunerisaanik missingersuusiornermi inatsit pisortani ingerlataqarfinni tamani, kommunit ilanngullugit, atuuttussanngortinneqassasoq, Inatsisartut aqqutigalugit aningaasartuutitut ukiunut arlalinnut sinaakkutissaliinikkut illersorneqarsinnaasunik aningaasaqarnikkut ingerlatsinerup qulakkeerneqarnissaanut iluaqutaasussanik, taarsigassarsinerit passunnerinut aamma ingerlataqarfiit akornanni pitsaanerusumik missingersuutitigut ataqatigiissaarisoqarnissaa qulakkeerneqarnissaa anguniarlugu. (Aningaasaqarnikkut Ingerlatsineq pillugu Nalunaarut 2015 qupp. 38, kalaallisut allassimasooq).

Tamatuma kingornali ersarissimangilaq ilumut Naalackersuisut sanaartugassanut taarsigassarsinernilu tulleriissaarinerminni akiitsunut aningaasaliisarnermullu periusaasoq tunngaviginiarneraat. § 37 atorlugu apeqquteqaateqarnikkut Aningaasaqarnikkut Naalackersuisoq akissuteqarpoq "Naalackersuisut Akiitsunut Aningaasaliisarnermullu periusissiap tunngavigisai Naalackersuisut tunngaviginiarpaat". Tamanna Inuit Ataqtigiinnit iluarisimaarparput.

Tamatta ilisimasatsitut ukiuni makkunani kissaatigineqarlunilu pilersarusiorneqarpoq assersuutigalugu mittarfeqarfinnik talliliiniarnerit aammattaarlu aningaasaliffigineqarnissamik pisariaqartitsiffiusut allat nunap aningaasaqarnikkut ataatsimut isigalugu unammillernartumik inissisimatilerfiusoq. Tamatta nunatta avataaniit nunanit allanit aningaasaliissutissat qamanissaat kissaatigaarput, nunatta avataaniili nunanit allanit aningaasaliisussat aammattaaq toqqammavigerpiarlugu aalajangiisuulluinnartumik inissisimasarpoq suliniut pineqartoq akilersinnaasuuniissaa aammalu nunap aningaasaqarnikkut qajannaatsumik tamat isigalugu inissisimanissaa qitiusarluni.

Taamaammat tamanna tunngavigalugu Inuit Ataqtigiinnit oqallinnissamik siunnersuummik kissaateqarpugut, Inatsisartuni partiit akunnerminni oqalligisinnaalissallugu naleqqussarsinnaassallugulu nunap akiitsunut aningaasaliisarnermullu inissisimaneer kiisalu akiitsunut aningaasaliisarnermullu periusissiaq atuuttoq naatsorsuutigisanut naapertuunnersoq.

Inuit Ataqtigiit aammattaaq kissaatigaat oqallinnermi pineqartumi suliassaqarfimmi Naalackersuisut politikikkut toqqammavigisaat ersarissarneqassasoq, kiisalu Inatsisartuni amerlanerussuteqartumik tunuliaqutserneqarnerisooq qulakkeerneqassasoq tunaartarisaq oqariartuutigisallu naapertuuttumik inissisimanissaat.

Inatsisartut oqaaseqaatissaanut siunnersuut:

Namminersorlutik Oqartussani kommuunini aammalu Namminersorlutik Oqartussanit ingerlatsiviit pigineqartuni aalaakkaasumik patajaatsumillu aningaasaqarneq Inatsisartut kissaatigaat. Taamaammat Inatsisartut Naalackersuisunut kaamattuutigaat akiitsunut aningaasaliisarnermullu periusissiaq Naalackersuisut ukioq 2012-imi suliarisaat naapertorlugu ingerlatsissasut, kiisalu qulakkeerneqassasoq oqallinnerit siunissami aningaasaliffigineqaratarsinnaasuni isertuannigitsumik nunap aningaasaqarneranullu naleqquttumik toqqammavilersorneqartassasut.